

泰和縣志卷十八

吉安府泰和縣知縣高陽冉棠重輯

人物志三

列傳

明

陳謨立子孔 劉崧子桷 蕭岐子忠 蕭執

廖謙 羅性 楊起予霖父用 劉仲啟

泰和縣志

卷十八

人物 列傳 一

楊卓 康縉 彭豫 王沂弟佑

王在 王迪吉 王泰 劉伯川

余斯延 梁蘭 彭羣 曾宜春子子叔

王環 陳彥強 蕭自成 蕭翀

羅晉用 康彥民 劉埜 劉麓

劉毅 嚴禮 楊清 鄧崇志

尹純 蕭介 周是修子應鰲 族孫

王韶 康漢 歐陽銘

明

□謨字一德號心吾洪武初徵至京師上賜坐議禮學士宋濂待制王禕交章請留為國子師以式國人引□辭□家居教授後學屢應聘為江廣考試官所拔皆名士自幼能詩文初習周易後兼通詩書三禮諸經傳傍及子史百家雖不願仕而當時之務熟籌胸中有叩如響嘗謂學必敦本莫加於性莫重於倫莫先於變化氣質若禮樂刑政錢穀甲兵度數之詳皆所當講一時經生學子靡然從之稱為海桑先生事親至孝晨昏省定之禮甘旨修滲之奉朝夕不懈尤

泰和縣志

卷十八

人物

列傳

二

篤友愛族黨中有為不善不敢使聞卒年九十六所著有海桑集書經會通詩經演疏

康熙志

按宏治志謨子孔立明經擅文章以薦為白水縣丞又人文紀畧載宋學士濂見謨文評之曰湯盤禹鼎噐之古也太美元酒味之正也惟知者知之楊文貞士奇有詩曰純明程伯子洒落邵堯夫想見其為人云又劉子高崧稱心吾鉅篇大軸流播郡邑幅巾野服翱翔山水之間門生見子扶攜後先使人望而敬之狎而愛之

□崧字子高舊名楚珠林人號槎翁家貧力學寒無鑪火手皸裂而鈔錄不輟元末舉於鄉洪武三年舉經明行修改今名召見奉天殿授兵部職方司郎中奉命徵糧鎮江鎮江多勲臣田租賦為民累崧力請得少減遷北平按察司副使輕刑省事招集流亡民或復業立文天祥祠於學宮之側勒石學門示府縣勿以徭役累諸生嘗請減僻地驛馬以益宛平帝可其奏顧謂侍臣曰驛傳勞逸不均久矣崧能言之牧民不當如是耶為胡惟庸所忌坐事謫輸作尋放歸十

三年惟庸誅徵拜禮部侍郎未幾擢吏部尚書雷震謹身殿帝廷諭羣臣陳得失崧以修德行仁對尋致仕踰年與前刑部尚書李敬並徵拜敬國子祭酒而崧為司業賜鞍馬令朝夕見見輒燕語移時未旬日卒病作猶強坐訓諸生及革敬問所欲言曰天子遣崧教國子將責以成功而遽死乎無一語及家事帝命有司治殯殮親為文祭之崧幼博學天性廉慎兄弟三人共居一茅屋有田五十畝及貴無所增益十年一布被鼠傷始易之仍葺以衣其子居官未嘗以

家累自隨之任北平攜一童徃至則遣還晡時吏退
孤燈讀書往往達旦善為詩豫章人宗之為西江派
云 明史

按舊志載宋崇寧政和間有南立在中嶽秀三人
者同負時名稱珠林三傑洪武間又有三傑則崧
及兄麓弟埜也崧七歲能詩嘗侍父養蒙夜寢聞
雞聲命成絕句曰喚醒人問蝴蝶夢起看天上火
龍飛世父驚曰是子必大用明初以賢良徵至京
宋濂見之歎曰太史公之流後楊慎評明詩崧為

泰和縣志

卷十八

人物

列傳

四

第一又按通志載吾學編劉祭酒傳稱其致仕歸
學問之功老而彌篤考子高卒時年甫六十一初
被謫歸年猶未滿五十家居久之復起為司業旬
日而歿於位非老而致仕者也所著有職方集槎
翁集尚有北平集及家藏詩十八卷又宏治志載
崧子名桷字仕鴻博學世其家洪武十七年以石
泉學諭徵至京將授官而卒妻周氏守節而死
蕭岐字尚仁柳溪人五歲而孤事祖父母以孝聞有司
屢舉不赴洪武十七年詔徵賢良強起之上十便書

大意謂帝刑罰過中訐告風熾請禁止實封以杜誣罔衣律科獄以信詔令凡萬餘言召見授潭王府長史力辭忤旨謫雲南楚雄訓導岐即日行遣騎追還歲餘改授陝西平涼再歲致仕復召與錢宰等考定書傳賜幣鈔給驛歸嘗輯五經要義又取刑統八韻賦引律令為之解合為一集每日曰天下之理本一出乎道必入乎刑吾合二書使觀者有所省也學者稱正固先生是時太祖治尚剛嚴中外凜凜奉法救過不給而岐所上書過切直帝不為忤史明

泰和縣志

卷十八

人物

列傳

五

按萬歷志稱岐性端重不事戲謔每在座客皆斂容諸侍者雖隆冬常汗語少不當則端坐不荅四方學者傾仰之其在平涼教大行屯營守帥及崆峒之夷皆遣子入學歲賔興應聘為楚閩二省正考官有正固先生集楊士奇為作哀詞又通志載其子忠幼被掠臨洮百戶何氏收為壻岐自平涼歸遇於道携還家其後遂為顯族

蕭執字子所洪武三年鄉舉為國子學錄明年夏至帝有事北郊召尚書吳琳主事宋濂率文學士以從執

偕陶凱等十二人入見齋所令賦詩復令賦山梔花
獨喜執作徧示諸臣寵眷傾一時時帝留意文學往
往親試廷臣執與陳觀知遇尤異執以親老乞歸親
沒廬墓側申國公鄧鎮勦龍泉寇不戢下執往責之
鎮為禁止邑人以安

明史

按宏治志稱執世居武山北麓仕為國子學錄施
教有方以親老乞歸便養以孝聞又開義塾以教
鄉人子弟親沒廬墓三年又萬歷志稱執善為文
章於詩尤工極類唐人甚為劉青田基宋金華濂

泰和縣志

卷十八

人物

列傳

六

所推重乞歸後日與同邑劉子高崧王子與沂昆
仲為溪山之遊學者宗之著有國錄集行於世

廖謙字自強世居文溪秀溪之上性孤介室中止琴一
張書一塢自號西溪愚夫又號愚寄翁元末舉明經
授清江學教諭辭歸洪武初應聘署本縣學教事文
章根本經傳不煩而足平居好學意興陶然未嘗一
事干請後學敬慕以為師表與劉子高崧王子與

昆弟同時相善著有愚寄集二十卷

萬歷志

□性字子理東廂人少孤力學避元末亂崎嶇巖谷未

□一日去書素性耿介不喜接俗人明初詔郡縣□
學應聘掌教洪武四年舉於鄉勅免會試授德安府
同知屬有巨寇號糟李萬戶者詔捕甚急糟李脫去
逮繫至數百人性諭之曰朝廷只欲糟李耳汝等皆
良民何甘受楚毒庇一糟李與之期悉縱之七日果
獲糟李省檄賦民鐵造軍器猝無所辦會治疏圃得
窖鐵萬餘斤同官皆勸以售民性曰天以濟民也悉
以代民充賦餘皆八官其廉潔惠民類此秩滿坐劾
謫戍西安學者從遊甚衆性學極博為詩文有法度

泰和縣志

卷十八

人物

列傳

七

楊士竒曾校其集傳於世

萬歷志

按萬歷志稱楊士竒少孤隨母改適性教育備至
官德安攜以隨行方七歲其母私告以姓士竒泫
然泣下即設磚為位祀楊氏於別室旦夕焚拜秘
無知者已而性覺仍復士竒姓卒為名臣又按明
史載性坐擅用棗木染軍衣謫戍西安四方老師
宿儒在西方者數十人吳人鄒奕曰合吾輩所讀
書庶幾羅先生之半其為當時所傾服如此

楊起子字賓素千秋鄉人父用霖通尚書旁及百家子

史元季無意進取教授閭里後進多所成就起子□
洪武四年鄉舉敕免會試為黃陂令清介自守甚有
惠政以考績卒於京黃陂民至今思之有祀於家者

宏治
志

劉仲啟太原人性剛毅不事家人生產讀書通大義洪
武初徵授陝州判官始至吏猾政梗欺偽叢生仲啟
剔其尤者痛治之民害以息俗信鬼公署旁有召公
祠常夜見四美婦持燭出入民異之爭相禱祀仲啟
曰召公豈為是必妖也察其蹤得二孤於祠前塔下

泰和縣志

卷十八

人物

列傳

八

立殺之又見祠旁池蓮鮮媚令人剪除池水盡赤自
是無為妖者

萬歷志

楊卓字自立洪武四年進士授吏部主事踰年遷廣東
行省員外郎田家婦獨行山中遇雨伐木卒欲亂之
婦不從被殺官拷同役卒二十人皆引服卓曰卒人
□必善惡異也二十人遇一婦亂且不能況殺之乎
列二十人庭下指兩卒曰殺人者汝也兩卒大驚服
罪遂生十八人坐事謫鳳陽屯種召為禮部主事改
杭州通判卓未至杭時有兄弟爭田累歲不決卓至

□涕不欲訊兄竟讓弟田卓精吏事吏不能欺而治
尚平恕民悅服焉病免卒

明史

按宏治志作楊自立名卓一字子淵景行姪孫徒
居千秋鄉並不載事實

康縉字宗正紳溪人性穎悟嗜學洪武四年進士任平
陰縣丞臨民有方陞知丹徒縣為政不尚苛刻以清
靜化民去弊興利民德之卒於官

宏治志

彭豫字與志洪武中為香山丞地僻俗囂前令率尚威
嚴豫至寬教令省刑罰廢墜具舉流亡來歸海濱屯

泰和縣志

卷十八

人物

列傳

九

帥暴橫悉遣還教民樹柵積石以禦倭寇寇不敢近
俗蓄蠱毒豫廉得之誅徙其家後莫有犯卒於官

廣東

名宦
志

王沂字子與埶街人父以道生元大德間曾遊汴主張
伯剛家張為汴梁總管力薦以道趣之入覲以道曰
吾受父母命客汴而已遊必有方不敢違也辭而返
至洞庭君山遇異人得養生術歸學養生號三槐居
士元亂寇過西昌每指其廬曰此王隱君家也相戒
勿毀去二子長即沂次佑字子啟兄弟俱明經赴試

不售遂隱居益攻經史學詩文貧無以養俱出館於外歲歸省互述心得以質所疑元末沂以遺逸舉佑舉茂才皆不就偽漢據江西邑陷有仕偽漢者薦之兄弟避匿三顧山中寇至則奉親竄伏蹊谷伺寇所向以為進止不得寧家者十有五年明初佑始舉明經除監察御史明年沂亦應聘為廣東貢士考官徵入說書既至上書論事授福建鹽運副使以老辭歸沂學嚴於義利之辨動循古禮燕處必恭平生不言人過接引學者色莊氣和隨材造就所居龍洲之上

泰和縣志

卷十八

人物

列傳

十

有竹百竿學者稱竹亭先生佑為御史凜凜有聲出為廣西僉事尋徙知崇慶州坐累罷歸兄弟年俱六十餘居必堂序出必鴈行峩冠袞衣玉立人表佑詩文燬于兵今所存者長江萬里稿沂詩文宋金華濂襄城楊伯謙為序

萬歷志

按通志稱子與兄弟皆未仕元人物志以兄沂為明人弟佑為元人白志據泰和梁潛所撰竹亭行狀改正今從之

王在字子所以道從子坦亮端厚博極羣書著五經文

字口自立課程不以寒暑少懈洪武初舉校官授贛州府學教授化導有方諸生多所成就

宏治志

王廸吉字浩吾西城人通五經卓然為鄉鉅儒受業者無間遠近出其門者皆博碩之士同時廖實字實翁著有繫辭釋義陳霖字雲從通經史為文章有奇氣皆以惇行博學教授閭里引掖後進與廸吉齊名

志

王泰字伯貞沂子以經術顯洪武十五年聘至京師應詔者五百餘人帝親御奉天門試之伯貞對第一授

泰和縣志

卷十八

人物

列傳

十一

試僉事分巡廣東雷州復呂塘廢渠清鹽法會罷分巡官召還為戶部主事命尚書趙俊受學以父喪服闋不時起謫居安慶者數年建文初復以薦知瓊州府崕州黎相仇殺以反聞且用兵伯貞捕其首惡數人兵遂罷瓊田歲常三穫以賦軍軍不時受俟民乏而歛急則因之以要利伯貞為立期三輸之而弊絕居數年大治流民來歸者萬三千餘口憂歸補肇慶未之官卒

明史

劉伯川沙村人家富而輕財年四十尚有田數千畝一

日悉散子其親閭所存臧獲一切遣去獨與妻處敝廬數楹僅蔽風雨旦暮餽粥而已平居不與俗人接然善觀人邑人楊士竒年十四五時與陳孟潔謁伯川村中二子皆以其故人子留欸特厚一日雪霽酒酣伯川命各賦詩言志孟潔賦云十年勤苦事雞□有志青雲白玉堂會待春風楊柳栢紅樓爭看綠衣郎士竒賦即景一首飛雪初停酒未消蹊山深處踏瓊瑤不嫌寒氣侵人骨貪看梅花過野橋伯川顧孟潔笑曰十年勤苦只博紅樓一看耶又曰不失風流

泰和縣志

卷十八

人物

列傳

十二

一進士也顧士竒笑曰寒士寒士鼎鼐噐也又曰人有不為也而後可以有為其存子乎惜子不及見也後孟潔果登進士為翰林庶吉士而卒士竒官至柱國少師皆如其言

萬歷志

余斯延自少立學從元進士劉雲章授書洪武初徵至京師以老病告歸長子學夔永樂二年進士所居名

果確齋梁潛為記

梁泊菴集

梁蘭字庭秀一云名廷秀字不移生元之季力學養母教授鄉人子弟工詩似魏晉間人有子二長曰潛次

田混皆教以明經飭行比長皆命出仕欲其報荅明時所居柳溪上闢畦蒔蔬雜種花竹日詠畦樂詩數首學者稱畦樂先生鄒仲熙之曰隱居樂道其詩冲淡閒雅有自得之致

通志

按宏治志作鍾挺秀字不移別號畦桑著有畦桑先生集

彭羣字與和月池人與從兄豫俱受學於安成劉雲章之門博通羣書同有詩名而羣尤長古選學成各教授鄉閭子弟曾膺袁州龍泉學聘為教官皆不就其

泰和縣志

卷十八

人物

列傳

十三

後與志聘為萬安訓導又以上書擢香山縣丞有政聲宣德中以子百鍊貴贈監察御史

萬歷志

按楊東里集與和篤倫誼世父没久未葬舉其柩葬瀘源山中時山中多虎為民患迨暮假息道旁神祠祠故無扃鎖虎夜環祠聲琥然與和不為動虎竟去人以為至誠之應問同產姊兵虜在衡州即日徒步走衡贖歸又走安成求得其孤姪以歸姪中道病死躬負屍行哭買地葬已乃行族弟死妻子貧不給恒分所有以濟居無餘貲而凡振窮

周急雖數無厭倦意

曾宜春字本立如驥從孫好古博推善屬文隱居教授學者宗之洪武五年知縣劉昭先禮為耆儒以咨政治其與人言必以正心誠意為本名其堂曰本心楊士奇為記年九十六以壽終子子叔分教石城縣學

卒于官

宏治志

王環字伯章梅岡人長身玉立音如洪鐘穎敏好學有志用世因親老絕意仕進篤於孝友凡宗族鄉黨育孤葬貧周急濟乏好行其善常以詩歌自娛自號樵

泰和縣志

卷十八

人物

列傳

十四

雪居士楊士奇為作記

康熙志

陳彥強以文學薦為麻陽縣丞縣雜猫徭最為難治彥強操持廉潔民敬信之逃竄山谷者還集三百餘戶四郊安堵俗少知學彥強身為之師講學諭道於是始有明經領薦者

萬曆志

蕭自成五十九都人性孝友撫兄孤如己子姪亦敬叔如父洪武中自成以事被逮翀引服從成與叔爭往不已相抱大哭官竟按籍坐自成翀哭于門外不去聞者傷之家有異荆一本五榦稱為孝義所感

康熙

□□

按宏治志洪武丙辰有旨起均糧城甃自成以稅多任總甲事造運舟命翀往莅之或有察其黨與並為奸利者朝廷遣官出讞翀引服在行恐自成不安即以書安慰其家謂叔父年老宜畝已當自行自成曰吾兄早亡僅一子未有嗣忍擠以往乎乃奮然出告姪翀實誣冒自成名在法自成當往二人廷爭不已至相持抱大哭官府不能決卒按籍坐自成而出翀

泰和縣志

卷十八

人物

列傳

十五

蕭翀字鵬舉以字行洪武辛酉以賢良應制賦指佞草詩曰昔在堯階指佞奸奸臣一見攝心肝祇今聖代多賢輔盡日階前翠色閒稱旨授蘇州同知山東鹽運副使以勤儉廉介稱為劉崧弟子編其師集以傳後以子鎡貴贈太子太師

林志

按舊志載鵬舉孝友事詳藝文志劉崧五荆傳又按通志謂蕭翀事林志與人物志畧同皆不及其兄弟而職方集所撰五荆傳則稱其同祖五人長曰翀次璉次璣次暉一門孝友致紫荊五榦之瑞

顧不及翀之官蹟疑為別有一人不知子高作口
時翀尚未仕惡得有宦蹟哉今考宏治志稱鵬舉
以賢良徵授蘇州府同知勤儉廉介後為山東鹽
運副使禦寒惟一緼袍詹事府丞陸中善使山東
還語於朝曰蕭運副潔清正直為山東第一惜老
矣未幾卒于官有詩集藏于家

羅晉用字楚材東廂人父景高貧而有守景高死時晉
用方弱冠女昆弟五人一以疾廢姪一人孤且幼晉
用刻苦奉母嫁妹婚姪兼養廢疾已則不娶迨姪有

泰和縣志

卷十八

人物

列傳

十六

子母強之娶乃從曾學醫得異傳屢著竒效而終不
言利劉雲章陳海桑皆稱為篤行君子

康熙志

按宏治志稱景高隱于酒有伯倫之達晉用隱于
隱慕龐安之為人

康彥民號忞窓洪武進士四令壯邑皆著賢聲初宰青
田改儀真巴陵以憂歸服除補天台政尚教化勸民
務本力農著有諭士民書萬餘言未幾告歸家居十
年宣德初巡按御史至天台邑民言彥民公廉有為
乞復召為縣御史以聞遂再蒞台治狀為浙第一中

□□□□江寧丞卒諸縣各祠名宦 豫章書

□□□子彥珠林人崧弟洪武中徵制禮作樂通今博

□□之士穎守舉埜以應條奏十事禮樂多所更定 林志

按舊志劉崧傳載其初任北平時子彥曾至省焉

留百日始還所著有西齋唱和集及其以國子徵

也子彥又應詔至京命自擇一官為豐城教諭又

攝縣事教行政肅其為詩文實由家學

劉麓埜兄字子中通書經長於詩文見元綱不振無意

進取結水竹居以教學者尤工西龍兄弟三人皆有

泰和縣志 人物列傳 卷十八 十七

資名人稱為珠林三傑 宏治志

劉穀字原實西廂人與王佑同時領薦同日拜監察御

史風裁肅然無忝厥職 宏治志

嚴禮字從禮宋秘書校勘肅之遠孫洪武間典教邑庠

徵試太極性善二論除國子學正明年開科取士館

下與薦者十七人禮與焉上嘉之授將仕郎復命註

解尚書賜坐講說屢被獎諭 康熙志

楊清字子肅洪武庚戌以舉授松江府知事上使下

一以誠意人不忍欺之三年遷福建鹽運使知事居

官服食一如布衣時雖廉潔不務為民沒之日家無一錢所著詩文有溪園餘閒錄宦游錄

宏治志

鄧崇志字彥高以文學德操與楊子淵羅子理齊名世

稱楊羅鄧洪武初分教邑庠徵授四川榮陽鹽井陘

茶鹽都運使經歷冰檠之操彌厲有詩文集

宏治志

尹純字務厚山田人洪武初分領本縣學教事陞上海

教諭嘗捐己田作陂以利耕種鄉人名曰尹公隄

宏治志

志

蕭介字安石十二都人嘗從劉子彥習詩尤工楷書洪

泰和縣志

卷十八

人物

列傳

十八

武十五年任解州鹽課使提舉轉廣鹽倉大使有海

天長嘯集

宏治志

周是修名德以字行洪武末舉明經為霍邱訓導太祖

問家居何為對曰教人子弟孝弟力田太祖喜擢周

府奉祀正逾年從王北征至黑山還遷紀善建文元

年有告王不法者官屬皆下吏是修以嘗諫王得免

改衡府紀善衡王惠帝母弟未之藩是修留京師預

翰林纂修好薦士陳說國家大計燕兵渡淮與蕭用

道上書指斥用事者為所怒共挫折之是修屹不為

動京城失守留書別友人楊士竒等付以後事具口
冠為贊繫衣帶間入應天府學拜先師畢自經於尊
經閣年四十九燕王即帝位陳瑛言是修不順天命
請追戮帝曰彼食其祿自盡其心勿問是修外和內
剛志操卓犖非其義一介不苟得也嘗曰忠臣不計
得失故言無不直烈女不慮生死故行無不果當輯
古今忠義事為觀感錄其學自經史百家陰陽醫卜
靡不通究為文授筆立就而雅贍條達初與士竒縉
靖及金幼孜黃淮胡儼約同死臨難惟是修竟行其

泰和縣志

卷十八

人物

列傳

十九

志云 明史

按萬歷志是修爵譽人少孤貧從游鄉先生胡渚
樵蕭國錄所著有芻蕘集觀感錄綱常懿範等書
所薦士梁潛等皆知名當時正德末邑諸生彭邦
瑞獻詩通言時事有一名尺地歸英主白日青天
見此公之句始祀鄉賢萬歷七年邑有司為之表
其里又康熙志稱是修子轅蘇州訓導萬歷中族
孫應鰲刻其遺集其自經之帶猶世藏之又人物
志載是修所著有詩集義論語類編廣衍太極圖

邇□家訓芻蕘集進思集綱常懿範等書今傳□
惟芻蕘集又人文紀畧稱是修詣國學縊於聖□
東廡下與明史異附存備考

王韶字九成自幼孝親年十三隨父出遇盜執其父□
殺之韶冒白刃抱父號曰寧殺我盜不忍舍其父去
又有讐家欲殺其父尋之不得竟欲殺韶或曰是□
脫父於益者奈何因讐其父而忍殺其子乎遂釋□

康熙志

康漢字魯章有孝行父病痿常侍湯藥衣不解帶既沒

泰和縣志

卷十八

人物

列傳

二十

廬墓三年一夕寇至伏地號曰家財恣所欲取惟無
驚吾先廬與老母耳寇哀其言棄去晨起必焚香告
天以祈母壽及母喪哀毀如喪父時

康熙志

歐陽銘字日新東廂人以薦除江都縣丞兵燹後民死
徙者十七八銘招徠拊循漸次復業有繼母告子不
孝者呼至案前委曲開譬母子泣謝去卒以慈孝稱
嘗治廡後隙地得白金百兩會部符徵漆即市之以
輸遷知臨淄常遇春師過其境卒入民家取酒相毆
擊一市盡譁銘笞而遣之卒訴令罵將軍遇春詰之

銘曰卒王師民亦王民也民歐且死卒不當答耶銘
雖愚何至罵將軍將軍大賢奈何私一卒撓國法遇
春鮮為責軍士以謝後大將軍徐達至軍士相戒曰
是健吏曾抗常將軍者毋犯也銘為治廉靜平恕暇
則進諸生講文藝或單騎行田間課耕穫邑大治秩
滿入覲卒

通志

按宏治志稱銘清修篤學元至正丙申與劉楚同
鄉舉明初州尹吳去疾首薦應詔授臨淄縣丞□
江都知縣不受私謁有古循吏風此作除江都縣

泰和縣志

卷十八

人物

列傳

二一

丞疑脫誤

泰和縣志卷十八

終